

FUNDACION FAVI CU CRITICA PISA RIBA PROYECTO DI AZV

"Ministro di Salubridad Publico tin masha hopi poder dictatorial"

ORANJESTAD (AAN): Cu gran asombro e dirigentenan di Fundacion Arubano pa esnan Visualmente Incapacita a tuma nota di e politica cu tin rond di e introduccion di un Aseguro Medico General pa cubri costo di malesa.

E puntonan cu nan tin contra e introduccion di un seguro general contra costo di medicina cu diripiente ta ser poni ta duna un imagen claro cu nan no ta dirigi riba e contenido di e proyecto di ley (cu ta kraak di tur banda), pero riba e idea mes di e introduccion di un seguro medico general.

Nan ta mira cu algun gruponan di interes den comunidá no ta interesa den loke ta bon pa henter e pueblo, pero solamente den nan propio posicion di privilegio.

FAVI a publica na 1986 un pleitnota extenso di e necesidad pa un Aseguro Medico General ta sinti cu awor nan mester halza nan voz no pa mehora su mes, ni pa su directiva of personal, pero na favor di e hendenan pa cual nan ta purbando di mehora pa hopi aña caba.

Por poco FAVI a logra haya algun punto positivo den e proyecto di ley, y cu solamente e punto di salida ta bon. E ta kraak di tur banda

hasta di "sordigheden" mahos.

Akinan por menciona cu por ehemplo tin dos capitulo 7 aden y tambe den un di e subparagrafonan diripiente ta laga un letra afo. E ta parece di ta un proyecto di ley cu a ser traha pura pura, mientras cu Ministro Charro Kelly tabata kier a bini cu e ley aki ya caba na Januari 1990.

Segun articulo tres tur persona na Aruba inscribi ta segura, pero segun articulo 49 como henter e pueblo ta ser laga afo cu excepcion di "minimumliders" y "ambtenaar". Ademas FAVI a kere cu e diferencia entre Ambtenaar y trahadornan di Gobierno a ser elimina, pero e articulo ey ta papia den repeticion atrobe di "werklieden en arbeiders". Akinan FAVI ta puntra: "Ra, ra, ra hoe kan dat?"

Registro Civil lo haya su mes hopi ocupa, como cu cada habitante di Aruba mester busca un 'uitreksel' for di e registro civil pa por ser inscribi.

E punto di mas importante ta, cu e trabao pura aki no ta nada otro cu un 'raam-regeling', cu Gobierno por yena manera e ta haya ta bon. Hasta Staten mes no mester worde meti aden, pasobra pa

por pasa un "invulling" cu medida general door di Gobierno, e medida aki mester keda djis diez dia na Staten pa estudio.

Si acaso Staten tin of no tin opinion riba esakinan no ta haci ningun diferencia, segun e stipulacionnan di e diseño. Ademas e Organo Ehecutivo, cu mester bira un persona di derecho, no tin ningun autorizacion, mira cu e Ministro atrobe den medida general na tur tempo por declara e decisionnan di e Organo Ehecutivo nulo. "E Ministro di Salubridad Publico tin, bao di e proposicion di ley aki hopi poder dictatorial".

No tin ningun palabra pa loke ta trata aumento di e premie. E palabranan "reserva" tin poni tras di e capitulo en cuestion.

BO TA BAY HOSPITAL? PERMISO POR ESCRITO!

Aunke e hecho ta existi cu Ministro di Salubridad Publico na cualkier momento por interveni, e autorizacionnan describi di e Organo Ehecutivo ta "huiveringwekkend". Ningun medico of specialista, di esun di e persona sigura mes no tin derecho pa dicidi encuanto un tratamiento medico. Cada cambio mester ser haci prome por escrito na e Organo Ehecutivo y despues worde aproba of desapropa por escrito. Esaki ta crea un situacion den cual absolutamente no por traha, cu excepcion si e Organo Ehecutivo ricibi un ehercito di medico y secretarianan kendenan por worde alcanza via fax y cu por duna contesta. Esnan cu a traha e proyecto di ley ta parece di no

tin confianza den e mediconan trahando na Aruba. Hasta si bo mester worde interna na Hospital esaki mester ser aproba por escrito y unda e duracion di bo estadia na Hospital lo worde dicidi di antemano.

"Esaki no ta cuida di salud mas, pero un intento pa reduci e cuida di salud mas tanto posible," segun FAVI.

Articulo 43 ta preocupa FAVI hopi. Si nan lesa bon loke ta para, akinan hasta e secreto medico di profesion di docternan na Aruba ta ser elimina y e paciente ta ser entrega cu tur su problema na e Ministro. FAVI ta indica cu si ta pa nan, ta djis manda e proyecto di ley di AZV aki den bari di sushi. Nan no ta compronde con e por a pasa den tur e instancianan aki sin cu nan a ripara e blundernan!

ARUBA CU MANGUSA FOLKLOREANDO NA BOSTON



ORANJESTAD [AAN] Ariba invitacion di AHATA, Aruba su folklore lo wordo presenta durante e "Winter Consumers" Show 1992 di Trans National Travel and Vacation World na Boston,

Massachusetts.

E grupo di baile folklorico MANGUSA bao direccion di Mario Albus folkloreando lo representa Aruba. Mangusa lo duna no menos cu 9 presentacion.

E delegacion lo sali awe dia 9 y lo regresa dia 13 di januari 1992. Nos ta desea Mangusa tur exito na Boston representando nos isla di Aruba.



**ARUBA
PALM BEACH**
RESORT AND CASINO

ARUBA PALM BEACH HOTEL & CASINO

Tin mester di: ~

Front Office Clerk/Cashier

Steward (Dishwasher)

Houseman

Poolboy

Busboy

Sales Representative cu Experiencia

Esun cu ta interesa por pasa personalmente na personnel office busca un formulario di dialuna pa diabierna di 9:00am - 3:00pm.

Nos ta ofrece un bon salario, seguro pa bo familia. Oportunidad di bai dilanti den cualquier ramo di trabao.